

曰惡是何言也兒一醮誓無它且尊姑日已傾西山兒雖不肖代先君護視固其職也無問遠近兒當從尊姑所之姑數喻之不可姑曰如是我子猶不死也乃與俱出邸棲居北郊理慧從是親操薪水養姑益篤三十年猶一日也杵築老侯聞其貞淑使近臣岡田匡隆源左衛門命出仕夫人氏理慧曰妾去邸之日自矢棄人間且不忍一日離姑也遂固辭不應尼崎侯召之亦辭曰於亡夫所事君且猶辭召命事姑之外亦復奚求匡隆反杵築每見親友屢語之稱其貞節而泣理慧江都人尼崎侯臣齋田清兵衛之女也

〔山陽遺稿傳〕節女阿正傳

節女名阿正父曰七兵業農又釀酒家頗豐二娶妻皆先死各生一女節女後妻出也初七兵年五十讓其家於外甥七左而別營舍老焉及病篤聚其族囑之曰吾命在旦夕而無丈夫子唯有二女以累公等願養嘉右妻以長女至於次女待其長妻之於長二以承宗家之緒嘉右者其後妻弟也長二者七左之子也親族相計如其言以長女配嘉右使之子育阿正焉阿正天質穠粹事嘉右夫妻甚謹嘉右性無賴不事事日與其村馬醫萬助飲酒沈湎典義父所與田業幾盡親族交規之弗聽是時阿正既長長二亦弱冠長二爲人質直勤恪而連遇災患產稍落是以因循未成婚也亦間隣邑曰勝浦村村長半五家甚富爲其子源五擇婦未得聞阿正有才姿欲獲之會萬助因事來村中語以其意萬助心竊計吾苟勾當此事則借此翁勢力何欲不成遂諾而歸語之嘉右嘉右大喜欲不謀親族而許之親族來請責其違舊約而規新利嘉右患之其明召萬助語故且曰爲之何如萬助曰請謀之愚兄道全呼道全至畫策曰本村長善次與半五聯職親善託以媒介使公然來請奴輩何能相沮也嘉右大喜使萬助潛往授意善次許諾偕來決議乃呼阿正告之說以利害阿正默然不答良久曰諸君爲妾計妾寧不荷雖然阿爺臨沒撫妾而許之二郎矣慈心所屬萬不可背百事唯命此獨不能從淚與言俱下道全等大怒曰吾輩所說不唯爲卿計利於義父施及吾輩與有榮耀焉舍此洪福而慕落魄之長二顛倒之甚嘉右又罵曰汝不肯此婚必有緣故意汝已密與長二通也余必逐出汝二人阿正低頭不言萬助曰事已至此何必喋喋